

---

---

# ÁRÓÐUR

---

---

Fréttabréf Ármanna

Febrúar 2008

---

---

## Þorrablótíð



*Það var í raun algjörlega uppselt á þorrablót Ármanna þetta árið, hvert sætið skipað og rúmlega 50 manns í salnum. Sem sjá má á myndunum hér að ofan, sem teknar voru af Ragnari Björgvinssyni, var glatt á hjalla og fólk í hátíðarskapi.*

*Guðni Kolbeinsson flutti prýðilega ræðu yfir mannskapnum og gítarsnillingarnir Halldór Bragason og Björgvin Gíslason léku undir fjöldasöngnum, auk þess að taka fáeina blús-standarda við mikið lof viðstaddra.*

# Flugur á netinu



*Snorri Örn með þriðja laxinn sinn úr Staðará á Ströndum*

Mér datt í hug að Áróður gæti verið með svolítið af upplýsingum um góðar netsíður um fluguhnýtingar og eins hvar kaupa má fluguhnýtingarefni við góðu verði

og jafnvel flugur sé því að skipta þar sem ég er búsettur núna í Brussel hef ég verið að sýsla við hnytingar eftir því sem tími gefst. Tók með mér áhöld og nokkuð

efni, en vantar alltaf eitt og annað. Eftir heilmikla leit fann ég eina búð hér með frekar litlu úrvali hnytingarefnis. Datt því í hug að leita á netinu. Til að gera langa sögu stutta birgði ég mig upp af Daiichi önglum, kúlum og keilum hjá [www.bearlodgeangler.com](http://www.bearlodgeangler.com) Þeir eru með úrval af hnytingartækjum og efni á hagstæðu verði. Svona til að menn hafi einhverja hugmynd um hvað bætist ofan á reikninginn, þá verslaði ég fyrir tæpa \$200,- og við það bættust \$29,50. Þetta var komið til mín eftir ca 10-12 daga.

Aðra áhugaverða síðu fann ég þar sem lýsingar eru á hnytingu fjölda flugna. Þetta eru einstaklega vandaðar lýsingar með fjölda mynda við hnytingu hvernar flugu. Nafnið á síðunni er: [www.flyanglers-online.com](http://www.flyanglers-online.com)

Að endingu er má líka nefna sænsku síðuna [www.fiskeflugor.se](http://www.fiskeflugor.se) sem sænskur vinur sonar míns benti mér á. Hann var í heimsókn hjá okkur sumarið 2006 og mokaiddi í vötnunum sunnan Tungnár með flugum úr búð þessarar netsíðu.

*Örn Svavarsson*

## Veiðikortið 2008

verður til sölu í  
Árósum til félagsmanna  
á sama afslætti og áður  
og kostar 4000 kr.

**ARMENN**

Landsfélag um þjóðlega náttúruvernd  
og stangveiði með flugu.

Árósum, Dugguvogi 13, 104 Reykjavík, sími 568 6051.  
Ritstjórn og ábyrgð: Ragnar Hólm Ragnarsson, [ragnarh@akureyri.is](mailto:ragnarh@akureyri.is).  
Umbrot: Dagur Jónsson. Prentun: Frum ehf.  
[www.armenn.is](http://www.armenn.is) / [armenn@armenn.is](mailto:armenn@armenn.is)



# Heimsþing stangveiði á Flórída



## Greinarhöfundur á veiðislóð.

Enda þótt sumir líti einungis á veiði sem léttvæga afþreyingu hafa Ármenn lengi vitað að veiðiskapur er ekki bara það heldur öllu fremur flókin vísindi sem alla ævina tekur að læra og eiga þó flestir enn margt ólært er kistan kallar. Og nú hafa vísindamenn eiginlega staðfest þetta. Eða svo gott sem. Fyrir nokkrum árum tóku nefnilega sérfræðingar um stangveiði upp á þeim sið að hittast á ráðstefnum og kryfja þar til mergjar ýmis atriði tengd veiði, því rétt eins og Ármenn vissu, er ansi margt sem skrifa má og skrafa um veiðar. Einhver sú stærsta er svonefnt Heimsþing stangveiði sem haldið er þriðja hvert ár. Síðasta þing var haldið í Þrándheimi í Noregi í júní 2005 og næstkomandi nóvember verður fimmta heimsþingið haldið í Dania Beach á Flórída.

Yfirskrift þingsins á Flórída er Veiðimaðurinn og umhverfi hans, enda hvíla umhverfismál þungt á sálu stangveiðimanna sem annarra

er ganga oft til fundar við náttúruna. Sérstaklega er ætlunin að taka fyrir sjö málaflokka og eru þeir eftirfarandi: Veðurfarsbreytingar og bein áhrif þeirra á veiðimenn, stangveiðina sem atvinnugrein og stjórnun veiða. Verndarsvæði í hafi og ám og vötnum; hvernig hefur tekist til og áhrifin á stangveiði. Sjálfbær nýting og stangveiði. Hlutverk stangveiði í samfélaginu. Alþjóðlegt samstarf í stangveiði. Vistkerfisleg stjórnun stangveiði. Hagrænt framlag stangveiði til þjóðfélagsins.

Þótt öllum sé í sjálfu sér frjálst þátttaka í ráðstefnunni er hún fyrst og fremst ætluð fiskifræðingum og þeim er hafa atvinnu af stangveiði á einn eða annan hátt, t.d. forsvarsmönnum veiðifélaga eða -fyrirtækja.

Ráðstefnan stendur dagana 10.-12. nóvember, en byrjar þó með móttöku að kvöldi hins níunda. Ráðstefnudagana sjálfa er gert ráð fyrir fyrirlestrum frá hálfniú

að morgni til klukkan fimm, með góðum matar- og kaffipásam. Þetta er upplagt tækifæri til að komast í samband við sérfræðinga og aðra á sínu sviði.

Dania Beach er 30 þúsund manna borg á strönd Atlantshafsins, rétt sunnan við Fort Lauderdale. Eiginlega er þó líklega rangt að telja borgina sérstakan bæ, því að hún er hluti af nær samfelldu þéttbýlissvæði norður af Miami sem telur um fimm og hálf milljón íbúa. Við bæinn eru góðar strendur og þar er hægt að stunda ýmsa afþreyingu er tengist sjó, sól og sandi. Meðal annars má leigja bát og freista þess að veiða ýmsa stórfiska er sveima út af ströndum Flórída.

Nánari upplýsingar um heimsþingið er að finna á heimasíðunni [www.worldrecfish.org](http://www.worldrecfish.org).

Sveinn Agnarsson #647

**Scott**  
flugustangir

SÖLUSTADIR:

Reykjavík: Intersport,  
Veiðihöllin og Veiðiportið

Akureyri: Hornið

# Skýrsla stjórnar

Ágætu fundarmenn, fundarstjóri og ritari.

Samkvæmt þeirri félagaskrá, sem við stjórnarmenn nú höldum réttasta og miðað við skilvísni og uppgjör og síðan afskriftir, erum við skráðir Ármenn nú í byrjun árs 273 talsins. Þetta er niðurstaðan eftir mikla, tímafreka og að við vonum vandaða yfirferð á greiðslustöðu manna, en vinnan sú, þar sem glímt var við fortíðardrauga og tölvuvandræði reyndist okkur mun flóknari, en ætla mátti. Afskráðir voru 32 fyrrverandi félagar og við bættust 11 nýir.

Þá er vert að geta þess sérstaklega að eins og fundarmenn vita er í lögum okkar svo kveðið á, að þeir, sem hafa verið í félaginu í tíu ár eða lengur og hafa náð 65 ára aldri, skuli ekki greiða árgjald. Þetta á nú við um 67 féлага og stefnir í, ef guð lofar, 70 á þessu ári og er þetta um fjórðungur félagsmanna. Þetta ákvæði er mun rausnarlegra en hjá þeim stangaveiðifélögum sem ég þekki til og auðvitað hið besta mál, og sem við getum verið stolt af. En þar sem ákveðinn kostnaður verður til á hvern féлага, og þar sem megintekjur okkar koma inn af árgjöldum, verðum við, sem enn höfum ekki náð þessu marki, að vera reiðubúin að greiða aðeins hærra árgjald en ella og gerum það vonandi öll glöð og stolt.

Samkvæmt ákvörðun seinasta aðalfundar var inntökugjald óbreytt frá sem áður var 10.000 kr og árgjald hækkað úr 5.500 kr í 6.500 kr.



Tillaga frá núverandi stjórn er að hækka ekki þessar tölur að sinni og hafa þær óbreyttar í ár.

Stjórn félagsins breyttist á seinasta aðalfundi, sem haldinn var í mars, þannig að tveir nýir menn komu inn í stjórn félagsins, en þá hafði Ragnar Björnsson fyrir nokkru látið af formennsku og flutt vestur yfir haf og Viktor Smári Sæmundsson, sem tók við formennsku eftir það, einnig kosið að víkja úr stjórn. Þeir sem inn komu þá voru Guðmundur Haukur Jónsson og svo ég. Stjórn Ármanna starfsárið 2007 var því þannig skipuð:

Formaður: Hilmar Finnsson

Varaformaður: Hafþór Ólafsson

Gjaldkeri: Jón Ólafur Skarphéðinsson

Ritari: Úlfar Ormsson

Meðstjórnendur: Guðmundur

Haukur Jónsson, Ragnar Björgvins-son og Örn Daníelsson formaður húsnefndar.

Haldnir hafa verið 19 bókaðir stjórnarfundir auk nokkurra vinnu- og samráðsfunda með nefndum og öðrum.

Starfandi nefndir og sértæk umsvif félagsins eru skipuð eftirfarandi mönnum:

Húsnefnd: Örn Daníelsson formaður, Gísli Jón Helgasson, Ásbjörn Jónsson, Egill Örn Árnason, Hjálmar Sæbergsson, Einar H Sigurðsson og Eiríkur Bjarnason

Hlíðarvatnsnefnd: Halldór Sigurðsson formaður, Eiríkur Einarsson, Kristján K. Haraldsson, Bjarni M. Svavarsson og Ásgeir Ásgeirsson

## Aðalfundur

Á aðalfundi Ármanna 23. janúar sl.

þurfti vegna forfalla að fresta afgreiðslu

4. liðar, um reikninga félagsins.

Hér með er boðað til framhaldsfundar

um þann lið mánudagskvöldið 25. febrúar 2008

kl. 20.00 í Árósum að Dugguvogi 13.



Ritnefnd: Ragnar Hólm Ragnarsson ritstjóri, Dagur Jónsson og Guðmundur Haukur Jónson

Stjórnandi heimasíðu: Ragnar Hólm Ragnarsson

Veiðisvæðanefnd: Daníel Smári Pálsson, Tryggvi Jónasson og Ragnar Björgvinsson

Skoðunarmenn: Halldór Lárusson og Sigurður Jónsson, Sigurður Benjamínsson til vara.

Fulltrúi í LS: Jafet S. Ólafsson

Og er þá upp talið, en rétt að staldra aðeins við því eins og menn heyra er hér ekkert minnst á fræðslunefnd. Nefnd sem var ein framvarðasveita okkar hér áður og kenndi fólki að kasta flugu. Þessi nefnd er ekki til eins og er og áreiðanlega svellur mörgum Ármanninum móður yfir því.

Á þessu sviði er samkeppnin orðin ærin og framboðið þó nokkuð umfram eftirspurn. Hvernig við stöndum að þessum þætti í framtíðinni er enn ekki alveg ljóst.

Fjárhagur félagsins stendur þokkalega, en hann verður til umfjöllunar undir næsta fundarlið.

Í félagslífinu voru helstu liðir 2007 þessir:

21. apríl héldum við vorblótið okkar undir klassískri stjórn Ólafs Skeggs og var þá húsfyllir og huggulegt í Árósum. Sérstaklega var ánægjulegt að sjá hversu margir mættu þá með börn og barnabörn.

Helgina 28. og 29. apríl var svo boðað til Hlíðarvatnshreinsunar og kjöt Súpu og fræðslu á staðnum, en þátttakan var ekki eins og vonir stóðu til, enda veður fremur óhagstætt. Til að ljúka þar ákveðnum hlutum mætti nefndin á staðinn seinna um sumarið.

Helgina 23. og 24. júní var boðað til og síðan farin hópferð Ármanna í vötnin sunnan Tungnaár undir forystu Guðmundar Hauks. Sú ferð var þokkalega sótt og þótti fara þannig að örugglega munu enn þá fleiri koma með næsta sumar.

Mánudagskvöld 1. október voru Árósar opnaðir með smá viðhöfn í upphafi vetrardagskrár.

Sú nýbreytni hefir verið tekin upp á hnýtingarkvöldunum, að fá



menn til að lesa upp úr bókum eða ritsmíðum að eigin vali og þá jafnvel eftir þá sjálfa. Þetta hefir mælst mjög vel fyrir og vonandi að þetta dafni. Við þökkum lesurum og ekki síst Stefáni Hjaltsted sem kom með þessa hugmynd í vor sem leið og reið á vaðið.

Miðvikudagskvöld 14. nóvember heimsótti okkur Magnús Jóhannsson fiskifræðingur hjá Veiðimálastofnun og sagði okkur frá stöðu sjóbirtingsins í Grenlæk og víðar og var mæting þokkaleg, þó margra af eldra Grenlækjarliðinu væri saknað.

Laugardag 8. des. kl. 14:00 buðum við í aðventukaffi þar sem sr. Birgir Ásgeirsson Hallgrímskirkjuprestur kom og flutti okkur afbragðs hugvekju. Náðum við þá akkúrat postulatlögunni eins og Gylfi sagði og er alveg klárt mál, að ef við ætlum að halda þessum fallega síð, þarf að breyta eitthvað fyrirkomulaginu og hafa þetta t.d. á mánudags- eða miðvikudagskvöldi snemma í jólaföstudni. Mér skilst að þessi hefð hafi verið við lýði síðan Ármenn fluttu í þetta húsnæði.

Auk þessa var hér dagskrá með veiðitækjakynningu, fróðleik um hnífagerð og svo bókakynning rétt fyrir jólin.

Áróður hefir komið út mánaðarlega síðan í haust og verður svo í vetur. Þar mæðir mjög á ritstjóra vorum, því segjast verður eins og er að Ármönnum virðist almennt ekki liggja mikið á hjarta eða vilja segja frá, þó ekki væri nema brot af því sem þeir eiga í pokahorninu. Ég hvet ykkur félagar góðir til

að efla málagníð okkar eins og þið eigið kost á með skrifum eða öðrum hætti.

Heimasíðan okkar var öll endurgerð undir umsjón ritstjórans og hefir hann séð um hana síðan.

Veiðisvæðaframboð okkar fyrir næsta sumar var kynnt í desemberhefti Áróðurs. Í boði voru 4 hefðbundin svæði þ.e. Hlíðarvatn, Grenlækur, Skálmardalur og Vatnsdalsá og auk þess 5 önnur sem eru Vatnamót, Eldvatn á Brunasand, Geirlandsá, Skógá og Vatnsá. Skil umsókna voru fyrir lok mánudags 7. janúar og fór úthlutun fram í vikunni á eftir. Félögum á nú að hafa borist janúarhefti Áróðurs þar sem kemur fram yfirlit úthlutunar ásamt reikningum fyrir veiðileyfum þar sem það á við.

Framundan í næstu viku er svo afgreiðsla veiðileyfa og þorra-blótið. Um aflabrogð á veiðisvæðum okkar seinasta sumar verður fátt sagt hér, enda segir í siðareglum okkar að Árnaður meti íþrótt umfram aflamagn og enn fremur hvatt til hófsemi.

Þó verður ekki undan því vikist að koma inn á þá staðreynd að aflabrogð í Hlíðarvatni voru minni en áður í manna minnum. Seinasta sumar veiddu Ármenn 317 bleikjur, sem er minna en helmingur þess sem veiddist 2005 og fjórðungur þess sem veiddist árið 2001. Sama var uppi á teningnum hjá hinum Hlíðarvatnsfélögum. Hvort þetta skrifast á náttúrulega sveiflu eða utanaðkomandi áhrif s.s. flunruna er ómögulegt að fullyrða að svo stöddu. Veiðimálastofnun hefur á



árinu aflað gagna til rannsóknar-úrvinnslu og ættu einhverjar vísbendingar að liggja fyrir í vor. Í góðri von og bjartsýni á við getum sýnt hófsemissregluna í verki, benda vanir Hlíðarvatnsmenn á að árið eftir ördeyðu kemur gjarnan aflahrota.

Í Grenlæk voru aflabrögð líka með minna móti svo ekki sé sterkara að orði kveðið, en svo mun vera reyndin á flestum ef ekki öllum sjóbirtingsslóðum í Skaftafellssýslum. Talningar Veidimálastofnunar benda eigi að síður til vaxandi fiskgangna þar um slóðir, og er sú von okkar og trú að þar muni birta upp um síðir.

Samstarf félaganna við Hlíðarvatn var með hefðbundnum hætti. Þar erum við með samning til ársins 2013. Á sameiginlegum fundi sem haldinn var í Skíðaskálanum í Hveradölum 3. nóvember s.l. voru lagðar fram veiðiskýrslur með þeim aflaniðurstöðum sem áður var minnst á, rannsóknir Veidimálastofnuna, ræddar hugmyndir um nauðsynlegar framkvæmdir á svæðinu og svo var lagður grunnur að því sem ekki má heyrast í dag, en það er samráð um verð veiðileyfa við vatnið.

Starf LS fer kannski ekki svo hátt sem mætti, en á þeim vettvangi er unnið starf sem er okkur sem

litlu félagi mjög þarft. Sambandið er vörn okkar og vopn á vígvelli lagasetninga og í ýmsum málum öðrum er snerta hagsmuni okkar.

Þar er og einnig hvatt til og hlúð að eflingu samstarfs milli aðildarféлага, og þar megum við ekki láta okkar á eftir liggja. Gildir þá eins og í öllum góðum samböndum að við Ármenn ýmist komum til með að veita eða þiggja.

Þannig bjóða Keflvíkingar okkur nýendurbyggt hús sitt við Grenlækjarflóðið til leigu þegar þeir eru ekki að nota það sjálfir, en það hjálpar þeim í þungum fjárfestingum og gerir okkur um leið fært að njóta þægilegra aðstæðna í betri nálægð við veiðislóðina en áður.

Frá þeim fengum við einnig hollin þrjú sem áður var minnst á í Geirlandsá til úthlutunar fyrir næsta sumar.

Hafnfirðingar, sem hafa áhuga á að komast í Grenlækjarflóðið, fá nú þá daga til úthlutunar sem Ármenn ekki sóttu um og gerir það okkur um leið ef til vill kleift að halda þessu veiðisvæði taplaust áfram. Það sem þá verður afgangur fer í Pottinn okkar svokallaða seinni hlutann í febrúar n.k. Vonir standa svo til að við fáum til úthlutunar daga í Djúpatvatni bráðlega.

Um það sem fram hefir farið á vettvangi LS undanfarið mun okkar maður þar, Jafet S. Ólafsson, fjalla nánar hér á eftir.

Stofnun sölukerfis á vefnum hefir verið til umræðu og haldnir um það sameiginlegir fundir með Stangaveiðifélagi Hafnarfjarðar, Stangaveiðifélagi Selfoss, Stangaveiðifélagi Akraness og okkur. Það snýst um netsölukerfi fyrir þá veiðidaga sem ekki seljast í úthlutun og hvort semja eigi við einhvern utanaðkomandi aðila um sölu eða stofna eigin sameignarvef, sem með tímanum mætti hafa hagnað af. Vefsala þessara veiðidaga er það söluform sem við hljótum að þurfa að taka upp fyrir en síðar ef við ætlum að lifa í nútímanum. Þetta mál er á byrjunarstigi og óvíst hver verður niðurstaðan. Gott væri að heyra á eftir hvað fundarmönnum sýnist í þessu efni.

Rétt er að geta þess í lokin að við eigum von á að sami háttur verði á næsta sumar og hefir verið undanfarið, að innifalið í árgjaldi Ármanna verði leyfi til veiða í vötnunum á Landmannafrétti sunnan Tungnaár. Samkvæmt skoðanaökönnun á heimasíðu okkar og 50 manns hafa svarað hefir um helmingur Ármanna farið og veitt á svæðinu.

Góðir fundarmenn. Á liðnu starfsári hefir stjórnin leitað til margra ónefndra félagsmanna um aðstoð og ráðgjöf í hinum ýmsu málum og verður að segjast eins og er, að undirtektir hafa bara verið á einn veg, allir boðnir og búnir til að vinna þessu blessaða félagshrói okkar sem best þeir mega og geta. Oftar en ekki er það svo, að niðst er á sama fólkinu aftur og aftur, og verður auðvitað áfram og vonum við bara að því fjölgi. Þessum öllum og nefndum okkar og samstarfsmönnum þakkar stjórnin samstarfið á liðnu ári.

Þakka gott hljóð.

HF

## Ertu með netfang?

Ármenn eru hvattir til að skrá netföng sín á póstlista félagsins með því að senda tölvupóst á [armenn@armenn.is](mailto:armenn@armenn.is) - og skrá sig einnig undir hnappnum *Skráning á póstlista á heimasíðunni [www.armenn.is](http://www.armenn.is).*



# Ánar í ánum

## Skilið við ána og spæni

Um það leyti sem ég var að ánetjast fluguveiðinni eftir áratuga beitu- og spónaveiði, aðallega í Veiðivötnum, kynntist ég nokkrum Ármönnum og einn þeirra fullyrti við mig að fluguveiði væri hin rétta aðferð vegna þess að það að beita maðki væri ekkert í takt við líf fiskanna í vatninu, þar væru engir maðkar og því óskiljanlegt að fiskur skuli gleypa þetta slímu-uga fyrirbæri. Ég taldi mig vita betur en þagði því þetta var einn af lærimeisturum hinnar göfugu íþróttar sem ég var að tileinka mér og ég bara (tæplega fertugur) stráklingur miðað við hann. Margt hef ég síðan um fluguveiði lært og sömuleiðis allnokkuð um okkur mannfólkið. Ekkert er óbrigðult en það minnkar ekki gildi manna og íþróttar þótt einhvers misskilnings gæti hjá mér eða öðrum um lífið og veruleikann.

## Um ána okkar og ána sem þar eru

Við hjónin fórum að veiða í ónefndri á á Suðurlandi í mikilli rigningartíð í lok september í fyrra og veiddum 3 urriða á einum eftirmiðdegi, tvo þeirra sjógengna en einn var með rauðum doppum og samkvæmt upplýsingum okkar er hann staðbundinn, þ.e. gengur ekki til sjávar. Miklir vatnavextir voru í ánni og þegar fyrsti fiskurinn var kominn á land vall út úr honum hvílk mergð af ánamöðkum að ég hef aldrei séð annað eins. Ég dró þá ályktun að vatnavextirnir hefðu hreyft við vatnsbökkunum og leyst ána úr bökkunum og fleytt þeim niðureftir í gin hinna gráðugu sjóbirtinga. Hinir tveir sem veiddust þennan dag voru einnig kviðfullir af ánamaðki þó ekki ylli út úr þeim ánamergðin eins og hinum fyrsta. Ég þarf ekki að taka það fram að veitt var á flugu og olívugrænn nobbler úr smiðju okka góða vinar, Stebba kokks, var sem fyrr sem göldrum líkastur.

## Grúskeðlið

Frá því ég man eftir mér fyrst hef ég verið náttúrugrúskari, safnaði m.a. skeljum og kuðungum fyrir hvatningu og í fyrstu undir handleiðslu Ingimars Óskarssonar, náttúrufræðings. Biblían var Skeldýrafána Íslands sem er í reynd tvær bækur, I. Samlokur í sjó og II. Sæsniðlar með skel. Báðar eftir Ingimar. Síðan unglingsárunum sleppti og við tóku sjálfskipaðar þrælabúðir húsbyggjandans og fjöl-



*Gunnar Kristjánsson skoðar lirlu vorflugunnar sem kom lifandi úr bleikjumaga. Það vellur ýmislegt upp úr fiskunum þegar þeir koma á þurrt land, eins og fram kemur í grein Guðmundar Hauks hér til hliðar.*

skylduföðurins, á ég allgott og vel rykfallið kuðunga- og skeljasafn. Grúskið er mér ennþá ástríða og skal nú komið efninu. Eitthvert sinn um sumar, seint á unglingsárunum, fór ég inn í Blikadal að njóta veðurbliðu og einsemdar. Tók ég þá eftir að þegar ég var að sulla í læk sem þarna rennur urðu nokkrir ánar lausir úr botnlaginu. Síðan þá hef ég hvað eftir annað grafið í sandbakka við ár og vötn til að kanna lífið í vatninu. Oftar en ekki hef ég fundið ána í botnlögum og bökkum veiðistaða. Tvo skal nefna. Í malarbökkum við Grímsá neðan vatnsborðs og í lindinni við vatnsbakkann við Dvergastein (við Langavatn) í Veiðivötnum.

Því nefni ég þessa staði fremur en aðra að þeir eru á ólíkum stöðum, annar undir 100 m yfir sjávarmáli og hinn yfir 400 metrum.

## Fræðsluhornið

Ánar mynda flokk liðorma (Annelida). Þessum flokki tilheyra fjölmargar tegundir sem finnast ýmist í sjó, ferskvatni eða rökum jarðvegi. Ánar á landi tilheyra tveim

ættbálkum, ánamöðkum (Haplotauxida) og hvítmöðkum (Plesio-phora), sem báðir finnast hér á landi. Ánamaðkar tilheyra ættinni Lumbricidae. Þeir eru móleitir á litinn, sívalir, liðskiptir og húðin er mjúk. Þeir eru tvíkynja, þannig að bæði egg og sæði myndast í hverjum maðki. Á fullorðnu dýrunum er belti sem verður áberandi á æxlunartímanum. Beltið gefur frá sér slím og úr því myndast hólkur utan um egginn. Eggshylkin liggja í efsta moldarlaginu og egginn þroskast á einu ári. Ekki ber heimildum saman um hvort 11 eða 12 tegundir ánamaðka lifi í jarðvegi á Íslandi en miklu fleiri eru áarnir ef allt er talið. Flestir þekkja gráana og taðána í sjón en vinsælastur til laxveiði er samt stórání sem kenndur er við Skotland.

*Guðmundur Haukur*

Heimildir: Veröldin í vatninu (Landvernd) og Vefsíður Náttúrufræðistofnunar Íslands og Landbúnaðarháskólans á Hvanneyri.

# Helstu liðir vetrardagskrár 2008

Miðvikudag 20. febrúar kl. 20.00

Veiðihornið með kynningu  
á því nýjasta þaðan.

Mánudag 25. febrúar kl. 20.00

Framhaldsaðalfundur  
og Potturinn!

Miðvikudag 12. mars kl. 20.00

Veiði í útlöndum,  
sjóndeildarhringsútvíkkun

Miðvikudag 2. apríl kl. 20.00

Hlíðarvatnsleiðsögn

Laugardag 19. apríl kl. 14.00

Vorblótið

Laugardag og sunnudag 26. og 27. apríl: Hlíðarvatnshreinsun.

**Öll virk mánudagskvöld kl. 20:00-22:00**  
**Skegg og skott**

**Hvergi meira úrval  
af vönduðum  
veiðibúnaði**



Hafnarstræti 5 - Sími 551 6760



**SPORTBÚÐIN**  
Krókhálsi 5 - Sími 517 8050



**VEIÐIHORNIÐ**  
Síðumúli 8 - Sími 568 8410

[Veidimadurinn.is](http://Veidimadurinn.is) - [Sportbudin.is](http://Sportbudin.is) - [Veidihornid.is](http://Veidihornid.is)